



**Oratio de vita et morte illustrissimi et laudatissimi memoriae  
herois, et sapientis principis, domini Gulielmi, Landgravii  
Hassiae, comitis in Catzenelnbogen, Dietz, Zigenhayn, et  
Nidda, etc.**

<https://hdl.handle.net/1874/402968>

ORATIO  
 DE VITA ET  
 MORTE ILLUSTRIS-  
 SIMI ET LAUDATISSIMAE MEMO-  
 RIAE HEROIS, ET SAPIENTIS PRINCIPIS, DO-  
 mini GULIELMI, Landgravii Hassiæ,  
 Comitis in Catzenelnbogen,  
 Dietz, Zigenhayn, &  
 Nidda, &c.

SCRIPTA AB

ANDREA CHRISTIANO,  
 Juris Doctore, & illustribus ac generosis. Comi-  
 tibus in Nassau Catzenelnbogen, &c.  
 & Hanau Mintzenberg  
 à consiliis.



HERBORNÆ  
 Typis Christophori Corvini,

---

clo 15 xcii.

ILLUSTRISSIMO, ILLUSTRIS-  
SIMIQUE GENERIS PRINCIPI  
ET DOMINO,

DOMINO MAURICIO, LANDGRA-  
VIO HASSIÆ, COMITI CATTIMELIBO-  
CORUM, DECIORUM, ZIGENHAINÆ,  
ET NIDDANORUM, &c.

ILLUSTRISS. ILLIUS ET LAUDATISS. MEMO-  
RIÆ HEROIS, DN. GULIELMI, PRINCIPIS CATTO-  
RUM, RELICTO UNICO FILIO, HERE-  
DI ET SUCCESSORI,

DOMINO SUO BENIGNISSIMO, HUMILI-  
TER OFFERT, DEDICAT, CONSECRATQUE

ANDREAS CHRISTIANUS.




HERBORNÆ  
Typis Christophori Corvini

cl. p. xell.

3

ORATIO.


 Itanta lacrymarum flumina singuli effundere possemus, quantū Lanus hanc inclytam Chatterorum Academiam præterfluens, undarum vehit, non satis deslere, lugere & deplorare possemus mortem Illustrissimi Herois, & sapientis Principis, Domini GULIELMI, Landgraviæ Hassiæ, &c. patris patriæ, & Domini nostri benignissimi, proxima xxv die Augusti, hujus anni 92 Cassellis placidè & piè obdormientis & defuncti; cujus memoria sit in benedictione. Nam si unquam casus aliquis nõ modò hinc provinciis, verum potiùs universæ Germaniæ, acerbus & gravis accidit, certè hic optimi Principis nostri interitus, nobis omnibus acerbus esse debet, & propterea meritò publicis omnium lacrymis desletur. Quem enim casus ille improvisus & indignus non afficeret? cujus viscera, imò medullas, non penetraret? tam præcipuum sacri Romani Imperii Principem, non solùm genere, dignitate fortunisque longè clarissimum; sed & pietate, virtute & sapientia præstantissimum, tam subito à nobis ablatum & avocatum esse, gravi admodum luctu, & desiderio tristi, non tantum Illustrissimis suis liberis, fratribus, & reliquis sanguine junctis, verum etiam subditis, & omnibus bonis ubiq; locorū relicto. Et enim hūc duris genuisset cautibus horrens Caucasus, Hyrcanæque admōssent ubera Tigres, imò corneæ, ut dici solet, fibræ homo, & plus quàm ferreus & aheneus esset, qui tanti Principis morte non moveretur. Quod enim de Palamede, post necè Socratis, publicè in theatro Athenis fuit recitatū, eum fuisse Græcorum optimum, & Iusciniæ Musarum Reip. utilem, id meritò de hoc nostro Principe affirmare & gloriari possumus, eum fuisse τῶν γενεάρχων ἄριστον, τὴν ἑδὴν ἀλύγιστον ἐκδόνα μυσῶν. Nec potuisset sanè periculosiore & perturbatiore omnium rerum statu mori, & quo magis ipsius sapiens consilium, & similis prudentia & au-

oritas; (præsertim ante annum 25 nimirum die Septembris, ex his terris similiter ad cœlestem illam patriam evocato Duce & Electore Saxonix, illo nomine, & re, veré CHRISTIANO, & eundem 6. Jan. die hujus anni, subito post subsequuto Duce JOHANNÉ CASIMIRO, Comite Palatino ad Rhenum; magnis illis Germanix luminibus) non tantum nobis, verum toti Reip. Christianæ profuisset, quam hoc ipso tempore, quo plaraq; orbis Christiani regna, Germanicum, Francicum, Pannonicum & Polonicum, propemodum ad periodorum suarum decurrerunt metas, & idcirco fluctuant, & nurant, & veluti jamjam corrui-tura videntur, & omnia bellis sunt repleta, imo bellum mediæ Germanix, dulcissimæ patriæ nostræ, jam infertur. & tanta, prohi-dolor, ubivis locorum gliscunt odia, tanta aluntur & foventur dissidia, cum ob certamina de religione in Ecclesiis mota; in quibus verbo quidem de veritate cœlestis doctrinæ, & salute Ecclesiæ, sed re ipsa de privatis odiis, ac commodis, ac multi de primatu dimicant, sicut veré Thucydides inquit, omnium ferè dissidiorum & seditionum causam esse τὴν ἀρχὴν διὰ πλεονεξίαν καὶ φιλοπρίαν; tum ambitione & variis studiis potentum, ut ipsa si cuperet salus, non posset res Germanix ulterius servare integras. Idcirco non dubito, quin quod apud Pindarum Adrastus de Amphiarao vate inquit: Desidero te oculum exercitus mei, qui eras utrunque, & vates bonus, & bellator fortis, nos brevi aliquando de hoc extincto Principe nostro dicturos esse: Desideramus te, Princeps optime & inclyte, oculum exercitus nostri, & in hac Reip. orbitate, & turbulentis motibus, sapientiam tuam, ceteri lumen, requirimus, qui eras utrunque, & vates bonus, & bellator fortis. Tantum enim justiores hujus querelæ causas habemus, quantum hic Princeps noster, & vates, & bellator, Amphiarao longè præstantior fuit, & quanto gravius vulnus Resp. ex ejus interitu accepit, quam passus est Argivorum ille exercitus, cum inter ceteros Duces etiam Amphiarao in agro Thebano amisisset: cum sanè amiserimus vatem, & heroem Ecclesiæ, & patriæ Principem

pem summum & sapientem, qui afflatus non Enthusiasmo fanatico, sed numine sancti Spiritus agitatus, non tantum religionem sinceriorem, & certamina de ea in Ecclesiis mota, verum etiam inde repullulantia, & indices magis magisque; crescentia odia & dissidia, & tandem suboritura extrema, nisi Deus hoc clementer avertat, pericula, si non fatalem interitum Ecclesiarum, & Reip. Christianæ, exacte & recte callebat, intelligebat, & prævidebat, sed pro sua sapientia & prudentia, tanquam veteranus miles, (prout secundum senarium Græcum, γυναιδ' ἀμείνους εἰσὶ τῶν γεραιτέρων, & senibus est rerum prudentia major, imò senis umbra est potior gladio vel lancea adolescentis, ut vulgò dici solet) ita hæc illa moderatus est, & ne ulterius serperent, vel majores vires acquirerent, & tandem profus erumperent, sua præsentia & autoritate cohibuit, ut solus propemodum usque hac intestina bella, hæc temporibus, & moribus, ubi vim patitur veritas, & unâ cum pietate procul exulat moderatio, pacisque; studium in Germania impedivisse videatur; optimè sentiens & intelligens, nullum bellum citius exardescere, & tardius deflagrare, quam ob religionem motum, sicut hoc ætas nostra hæc annis, & quidem non sine magno detrimento, & incommodo Germaniæ in bellis Belgicis, & Gallicis, quorum nullum adhuc videmus & prospicimus finem & exitum, satis superque experta est, & quotidie experitur. Quid verò ex oculis eo nunc sublato & remoto, in posterum fiet, vel futurum sit, forsitan brevi, & quidem cum periculo non tantum nostro, sed totius Reip. experiemur, & Deus solus novit. Nolo equidem malè ominari, sed nescio quid mihi mens mea præfagit, ne Deus iratus nobis hunc patrem, & optimum Principem, præsertim hoc tempore, eripuerit, ne ipsius consilio & auxilio amplius uti frui possimus, & cum eo, omnis mutua consensio & salutaris pax & tranquillitas in Ecclesiis & Rebus sit extincta. Interim ferendum est æqua mentenecculandum, quod summo Imperatori & Domino aliter placuit; *Θεὸς γὰρ ἐτελείετο βελή;* & simul orandus est Deus Opt. Max. ne

singulari suo beneficio & munere, quo Germaniam præ aliis nationibus generis humani, hac ultima & effoeta mundi senecta, affecit & ornavit, accensam inter nos lucem veritatis suæ deleri vel extingui sinat, sed semen sanctum sibi etiam in posterum apud nos clementer colligat & conservet, à quo in hac & postea illa altera & cœlesti vita in perpetuum celebretur & glorificetur: quod propter te, propter te, æterne pater Domini nostri Jesu Christi, unici salvatoris & redemptoris nostri, ut facias, & quandiu tibi visum fuerit, pacem & tranquillitatem, nec non halcyonia, in quibus puritas verbi tui ad posteritatem quoq; nostram, si qua futura est, transferri & propagari possit, largiaris, adidentibus animi gemitibus precor & oro.

Cùm autem viventem hunc Principem, non modò propter singularem ejus erga me clementiam, qua me integros propemodum quindecim annos, à quo tempore in variis & gravibus legationibus Illustrissimi & fortissimi illius Herois, Domini GULIELMI, Principis Auræicæ, laudabilis memoriæ, & illius illustris & generosissimi fratris, Domini JOHANNIS, Comitæ Nassoviæ, Domini mei gratiosissimi, ejus Celstitudini innotescere cœpi, complexus est ita, ut me tandem etiam, licet tali munere indignum & imparem, in aulam & ad consilia sua accersere & adhibere voluerit, & satis amplum mihi stipendium offerebat, si res meæ ita tulissent, ut me Cassellas conferre potuissem; sed etiam propter multas præclaras & egregias sapientis animi dotes, & virtutes, unice admiratus sum, & amârim: non potui facere, quin pro meo erga opt. Principem sincero amore, & debita gratitudine, in hoc publico luctu, acerbissimoq; omnium dolore, aliquid illius piis manibus parentarem; nō quòd ingenii inopia & dolore impeditus, justum encomium laudū illius instituire hoc tempore velim vel possim, sed ut hac misera & tristi voce saltem aliquam grati animi declarationem erga defunctū, & potissimum hoc ipso ostendam, quàm jucunda mihi illius virtus, grataq; semper officia fuere.

Et

Et quia usitatum est initio, de patria illius, cujus encomium instituiamus, dicere, quae si antiquitate cum aliis provinciis certat, & bene morata est, auget decus, & homini tanto maiorem auctoritatem conciliat, & aliquid ornamenti adfert. Unde non dubito divinitus omnium hominum pectoribus mirificum quendam patriae amorem insitum esse, ut nimirum tanto magis extimularemur ad defensionem illarum maximarum rerum, quas patria continet & complectitur, religionis, legum, disciplinae; imo vero ut admoneremur, etiam illam coelestem sedem amandam & appetendam esse.

Idcirco nemo tam dissoluti est ingenii, quem non cupiditas aliqua teneat, cognoscendi antiquitatem patriae, & quasi picturam veterem; sicut videre etiam iuvat illa tecta, quae nascentes primum exceperunt, cujus rei etiam tanta vis est, ac tanta natura, ut Ithacam illam in asperrimis saxulis tanquam nidulum affixam, sapientissimus vir immortalitati anteposuerit.

In confesso est autem, Chattos esse Hessos, & Castellam a Chattis nomen habere; sicut & Cornelius Tacitus testatur, Andernham, dicit Eder/Chattorum esse flumen, quod ut suam originem in hac vicinia habet, ita Hessiam perlabitur. Et scribit idem Tacitus, Hermunduros, quos Voitlandos & Misnenses fuisse existimant, cum Chattis, id est Hessis, de fontibus salis dimicasse; prout credibile est, de illis ipsis salinis tunc temporis certatum fuisse, quae sunt vicine Misniae ad Salam, ubi nunc est urbs, quam Halam Saxoniam vocant: sicut & veterem militiae & virtutis laudem adhuc Chatti seu Hessi tuentur. Sic quoque Plinius naturalis historiae scriptor, qui anno Christi 82 in incendio montis Vesuvii periit, Chattorum meminit, quod populi sint Germaniae non procul a Rheno. Et Dion scribit, Domitianum Imperatorem, Titi Vespasiani, everforis urbis Hierosolymitanae, fratrem, qui circiter annum Christi 90 vixit, expeditionem in Germaniam contra Chattos suscepisse. Qui vero fuerint limites Chattorum, non satis certum est, nisi quod consentaneum



est, ad occidentem fuisse *Cattenehbogen*/ quæ vox *Cattimeliboc*os, hoc est, *Chattos* à *Meliboco* monte, qui in itinere intra *Darmstadium* & *Heydelbergam* monstratur, ad *Rheni* ripam progressos, seu *Chattorum* anconem significat. Possederunt autem quidam *Hassiam* superiorem seu montanam versus *Saxoniam*, *Buchoniam*, item & *Franciam*, circa *Würtzburgum*: item *Comitatum Hennebergensem*, cum vicina *Thuringiæ* parte. Quorum verò pars circa *Cassellas*, *Gottingam* & *Padebornam* versus, ubi est aditus à montibus *Abnobiis*, dem *Hessischen Gebirge*/ ad *Westphaliam*, sedit, *Catturii* in historiis appellantur.

Cum autem *Conradus* Imperator, cognomento *Saliquus*, intercessione conjugis *Gisela*, agnato ejus, *Ludovico* nomine, ex veteri stirpe *Francica*, cui nonnulli titulum *Comitum Aurelianensium* tribuunt, ab *Hugone* Episcopo *Moguntino* fratre, partem quandam *Thuringiæ* impetrasset, & postea *Lotharius* Imperator, hujus *Ludovici* nepotem, avo homonymum, collocata ipsi prius filia *Hedvige* in matrimonium, supra ceteros *Thuringiæ* *Comites*, quorum tunc temporis numero duodecim erant, extulisset, & nova ornatum dignitate *Comitem* provincialem, seu ut vocant *Landgravium* constituisset, & ut aliis potentia & viribus antecelleret, adjunctione cōjunctarum terrarum *Thuringiæ* & *Hessia* auxisset: Ab hoc *Ludovico* cognomento *Barbato*, *Lotharii* Imperatoris genero, stirps *Landgravorum* *Thuringiæ* defluxit, qui regionem utramque *Thuringiam* & *Hessiam* usque ad *Ludovicum* ultimum, cognomento sanctum, & *Divæ Elizabethæ*, foeminae à pietate celeberrimæ, maritum, tenuerunt. Hæc matrona nata patre *Andrea* rege *Ungariæ*, & matre *Gertrude*, quam cum absente marito *Banebicanus* præcipuus gubernator domus regiæ, cui rex *Andreas* & regni & conjugis ac liberorum curam demandarat, obstupratam sibi à reginæ *Gertrudis* fratre, conjugem, obtruncasset; & postea hæc *Elizabetha* maritum *Ludovicum*, *Landgravi-*

um Hessiæ & Thuringiæ, in terram sanctam profectum, & nau-  
 sea navigationis extinctum amisisset; præterea filium Herman-  
 num, decimumoctavum annum ætatis ingressum, improba  
 quædam anus, cum planctu subditorum, veneno sustulisset; de-  
 nique ab Henrico mariti fratre possessione sua expulsa esset: ista  
 omnia tamen mala & varias calamitates tanta animi patientia  
 & virtute superavit, ut postea se mundo veluti abdicarit, & to-  
 tam precibus & cultui divino, nec nõ commodo & usui paupe-  
 rum devoverit, & tandem propter pietatem & munificentiam  
 erga egenos & Christi ministros, a Gregorio IX. Pontifice Rom.  
 Perusii urbe Italiæ anno 1235 inter sanctos sit relata. Dicitur  
 hæc hospitale in domo Theutonica, ut vulgò vocatur, in cujus  
 etiam templo anno 1231 est sepulta, & ejus monumentum  
 adhuc visitur, fundasse: cum familia ordinis Theutonicorum,  
 quos a professione & symbolo Marianos appellant, initium, 42  
 annis retrolapsis, antea ad Ptolemaidem, Imperatore Henrico  
 sexto, habuisset, autoribus quibusdam familiis urbium Bremæ  
 & Lubecæ, qui magnis sumptibus ædificato & extracto ibi xe-  
 nodochio, in usum eorum, qui familiæ infererentur, postea cum  
 numerus eorum crevisset, ceu colonias inde in Germaniam de-  
 duxerunt, gubernatione ejus familiæ commendata cuidam Hen-  
 rico Walbodio, qui primus munus ut vocant Magistri subiit,  
 seu primus hujus ordinis magister fuit. Novæ postea coloniæ in  
 Germania, nõ malo, sed pio & optimò consilio, quo nihil aliud  
 quam plantatio & propagatio Ecclesiæ, & Imperii ampliatio,  
 nec non familiarum conservatio, spectatum fuit, auctæ & robo-  
 rata, & numero opibusque ditata, Friderico secundo imperan-  
 te, Borussiam, & aliquanto antè Livoniam, domitis barbaris  
 gentibus, Imperio adjecerunt, & diu exceptis repressisque feli-  
 citer ferarum gentium irruptionibus, velut murus ista loca se-  
 ptentrionalia protexerunt.

A morte verò Ludovici sancti, cui nupta fuit, ut dixi, diva  
 Elizabetha, & fratrum illius Landgraviorum Hessiæ & Thurin-

gię, de jure successionis cōtendebant Henricus, Marchio Misnię, & Henricus, Johannis Brabantię Ducis filius. Uterque allegabat matrem, ille Juttam, fratrum Landgraviorum Thuringię & Hessię sororem; hic Sophiam, tertii fratris Ludovici sancti & divę Elizabethę filiam; & nitebatur uterque studiis, favore & auxiliis subditorum, sed diversorum. Henrico enim Marchioni adhærebant vicini Thuringi Isenacum usque; Henricum verò Brabantinum fovebant & sequebantur Hessi. A disceptatione ad arma deventum; variâ fortunâ aliquoties dimicatum est. Tandem tamen illud bellum ita solutum & sopitum est, ut Brabentinus Hassia contentus, usque ad definitos limites, ab Isenaco & Thuringia universa abstineret, quæ Henrico Marchioni Misnię cessit. Quam transactionem cum deinceps Rodolphus Imperator ratam haberet, Principes, amicitia inita ac foederibus, vicinię jura arctioribus, etiam majoris necessitudinis vinculis, quæ in familiis ducum Saxonię & Landgraviorum Thuringię, nec non Landgraviorum Hassiæ, in hodiernum usque diem adhuc durant & conservantur, sanxerunt, ut qui priores decederent, aliteros heredes suarum ditionum relinquerent.

Est autem Brabantię ducum origo à Comitibus Lovanię; qui antiquitus simul Lotharingiam tenuerunt. Sed ab his devoluta est Lotharingia in Comites Bilionæos, inter quos claruit Godefridus Bilionæus; qui cum sub Imperatore Henrico quarto, Ducatu Bilionæo vendito, memorabili in terram sanctam sive Palestinam, cum Balduino & Eustathio fratribus, & aliis comitibus, expeditione, Turcis procul ex anteriore Asia ad Pontum usque abactis, & Saracenis in Aegyptum depulsis & conclusis, primus conscensis & superatis moenibus in urbem Hierosolymam eruperat, & anno Christi 1099 primus rex Hierosolymorum creatus esset: regni tamen titulum & insignia se ideo suscipere nolle dixit, quod indecens duceret, diadema aureum hominem peccatorem gestare in ea urbe, in qua Salvator mundi, æternus rex noster, spineam coronam suo sacratissimo sanguine

guine madentem gestasset; idcirco ei ad sepulchrum Domini- cum flexis genibus procumbenti, spineam coronam cum signo crucis impositam esse perhibent. Unde adhuc Duces Lotharingæ signum crucis inter alia arma in suis insignibus gentilitiis gerunt; cujus regni nomen & insignia similiter quoque ab eo tempore, quo Fridericus II. Imperator anno 1229 post, Suld- anum ad eas pacis conditiones adigit, ut urbs Hierosolyma, cum oppidis Nazareth & Joppe, aliaque loca Imperatori restituerentur, & induciæ inter Christianos & Saracenos in decenniũ sancirentur, qui Siciliae regnum hætenus possederunt, in hodiernum usque diem usurpant. Huic Godefrido deinceps in Lotharingia successit Henricus ex stirpe Comitum Limburgensium, qui filios reliquit Conradum & Henricum; quorum hic in Hispaniam militatum abiit; ubi cum multa præclarè gessisset, ab Alfonso rege VI. Castiliæ & Legionis, in præmium militiæ impetravit filiam notham, & cum ea regnum Portugalliæ: Conradus verò absque sobole mascula mortuo, Henricus V. Imperator Lotharingiam tradidit Godefrido & Wilhelmo fratribus, Lovanii Comitibus, qui partiti sunt inter se Lotharingiam, ut Godefridus inferiorem & mari Rhenoque proximam, Brabantia nomine, quod de provinciæ corrupto nomine extitit, retinuerit, & Wilhelmo superior Lotharingia ad Arduennam sylvam & Mosæ fontes cesserit. Hic Lotharingicos procreavit Principes usque ad Carolum ultimum, à quo devolutus est Ducatus ad Fridericum Comitem de Vadimont, authorem stirpis Ducum, qui nunc Lotharingiam tenent. Godefridus verò Brabantinos Duces produxit, ex quibus Henricus Dux Brabantia, Sophiam, filiam Ludovici, Landgravii Hessiæ & Thuringiæ, & divæ Elizabethæ in matrimonium duxit, & cum ea Landgraviatum Hessiæ acquisivit; unde Illustrissimi Principes nostri, qui adhuc hodie rerum in Hassia potiuntur, suam originem trahunt, quorum majores si titulum & insignia Ducatus Brabantia retinuisent & cõservassent, forsan etiam jam Brabantia potirentur.

tur; qui Ducatus, cum Brabantinorum Ducum stirps in Belgio defecisset, postea ad Comites Hollandiæ est translatus, unde ad Comites Lucelburgenses, & tandem ad domum Burgundicam pervenit.

Quæ ideo tam prolixè ex historiis repetere volui, quod partim multi, etiam in his terris nati, vel alioquin in iis degentes, & Illustrissimorum Principum nostrorum clientela & protectione utentes fruentes, imò quotidie in hac urbe domum Theutonicam, ut vocant, prætereuntes & aspicientes, neque de antiquitate hujus gentis, vel origine Principum nostrorum cogitant, vel illius meminerunt, cum tamen turpe sit historiam suæ gentis & patriæ ignorare; partim quod ista omnia in tantò majorem dignitatem & auctoritatem Principum Hassiæ redundant, cum quod antiquitate gentis & generis, non facile aliis provinciis Germaniæ & Principibus cedant, sed cum illis contendere possint; tum quod secundum Horatium,

*Fortes creantur fortibus, & bonis  
Est in juvenis, est in equis, patrum  
Virtus, nec imbellem feroces  
Progenerant aquila columbam.*

Quod eleganter nostri temporis Poëta, meus popularis, Georgius Sabinus, Brandeburgensis, paulò aliter elegiaco carmine expressit:

*Fortibus eduntur fortes, clarioris parentum  
Semine progenies orta, timore caret;  
Non parvidam Veneris volucrem Jovis armiger ales  
Imbellem generat, nec leo fortis ovem.*

Ut autem revertatur oratio nostra, unde paulò digressa est, natus est noster inclytus heros, Landgravius G U L I E L M U S, de quo jam verba facimus, 24 die Junii, qui erat Johanni Baptistæ sacer, anno gratiæ 1532, quo ipso, 13 Augusti post, obiit optimæ recordationis Princeps J O H A N N E S Dux Saxonæ Elector, Friderici illius, cognomento Sapientis, frater & successor; qui biennio

biennio anté, anno nimirum 1530, uná cum aliis sibi conjunctis Principibus, Georgio nimirum Marchione Brandenburgensi, Johanne Friderico Duce Saxonæ, Ernesto Duce Brunsvicensi, & nostri jam defuncti Principis, opt. & fortissimo patre, PHILIPPO Landgravio Hessiæ, Francisco Duce Lunæburgensi, Wolfgango Principe Anhaltino, & civitatibus Imperialib. Norimberga & Reutlinga, Confessionē quam vocant Augustanam, á Philippo Melanthonē, communi præceptore nostro, conscriptam, Carolo V. Imperatori postridie Johannis, 25 nimirum Junii, qui tunc fuit dies Sabbati, proximé dominicam secundam Trinitatis præcedens, Augustę Vindelicorum in Palatio Cæsaris exhibuit.

Et fuit hic ipse tricesimus secundus annus, quo Albertus Cardinalis & Episcopus Moguntinus, & Ludovicus Palatinus, Electores, primam á Cæsare pacem sacram impetrarunt, ne videlicet religionis causâ cuiquam in Imperio ulla molestia crearetur, ad usque Concilii tempus; aut si nullum celebraretur, tantisper donec per ordines Imperii alia inveniretur ratio hoc diffidium sanandi & componendi. Quantumvis enim anno 30 editum non nihil asperius contra Ecclesias Protestantium, hoc est, Euangelicorum statuum sive ordinum, vt hodie appellantur, promulgatum fuerat, & Caroli V. Cancellarius Heldus, cum Moguntia pauló póst Albertus Episcopus Moguntinensis, & Dux Palatinus Ludovicus de Germaniæ pace cum Carolo V. collocti fuissent, ipsius astantis nomine aliquanto durius responderat; Cæsarem, qui alia etiam regna haberet, decretum adversus hæreticos in Comitibus factum, etiam si vastanda esset Germania, omnino exequi decrevisse; hunc tamē interpellans Cæsar dixisse scribitur: Hæc non jussi te dicere: siquidem Germaniam, quæ mihi patria est, & á qua summum Imperii decus & diadema accepi, vastari nolo, & Imperator potiús salutem orbis terrarum, quantū potest, Deo juvante consulere debet. idcirco data Moguntino & Palatino de pace cum Protestantibus agen-

di potestate, eam tandem confectam Ratisbonæ anno 32 confirmavit. Quod eo potissimum sine recito & commemoro, quod nimirum singulari Dei munere & providentia factum sit, quod Princeps noster GULIELMUS eo potissimum tempore natus est, quo DEUS misertus generis humani, tam densis tenebris oppressi, & titulo Ecclesiæ Romanæ ceu fascino miserè dementati, inque tam profundis superstitionum & Dei Maozim (quem secundum Danielis prophetiam auro & argento coluerunt, & adhuc in Papatu, non sine maxima & gravissima idololatria & ἀρτολασεία, & horribili contumelia filii Dei, & profanatione nominis ejus, colunt, & propterea genus humanum fatalibus pœnis, bellis, dissidiis & aliis calamitatibus publicis premitur, & dextera regni Turcici, vindex idololatriæ & scelerum, quibus orbis Christianus inquinatus est, confirmatur) involucris detenti, & propemodum submersi, ineffabili bonitate pauló antè excitaverat MARTINUM LUTHERUM, ei que adjunxerat fidum laborum socium, ceu *παραστάτην καὶ σύνοργον*, PHILIPPUM MELANTHONEM, quorum ille insolubilem tunc temporis, imò terribilem & formidabilem omnibus Christiani orbis Regibus nodum Gordium Pontificiæ Hierarchiæ in Germania, uno verbi divini ictu validissimè incidit & sustulit; (quo eodem tempore simul ULRICUS ZUINGLIUS, nondum sciens quicquam de primis Lutheri Disputationibus contra indulgentias Pontificis Romani, puriorem doctrinam in Helvetia profiteri cepit) Hic verò MELANTHON controversias tunc temporis de religione motas, miravi ingenii, & dexteritate planè divina, ex intricatissimis scholasticæ doctrinæ labyrinthis, ad planissimam & explicatissimam methodum revocatis, Disputationibus & piis doctissimisque scriptis suis illustravit & defendit. Et cum præcipua laus sit, ut inquit Basilius, unam habere patriam laudatissimam, Ecclesiam, sanè pro magno Dei dono & beneficio est habendum & censendum, quod Prin-  
cipem

cipem nostrum non in tenebris Papisticis, Cymmeriis densioribus, sed sub initium reformatæ religionis, & quidem tempore, à tot piis & laudatissimis Principibus, & inter alios etiam, Celsitudinis suæ illustrissimo parente, Domino PHILIPPO Landgravio Hassiæ, optimæ memoriæ, cum magna animorum constantia (sicut ferunt Georgium Marchionem Brandeburgensem tunc temporis Carolo quinto Imperatori in faciem dixisse, paratum se esse, potius collum ac cervicem carnifici præbere, quàm doctrinam eâ Confessione repetitam & oblatam abjicere) exhibitæ Augustanæ Confessionis, nasci voluerit, procul dubio, ut illo in posterum ceu salutari instrumento & organo propagandi & tuendi veritatem doctrinæ cœlestis uteretur, sicuti eandem etiam doctrinam hætenus egregiè & fideliter defendit & tutatus est.

Sic quoque arcano veluti fato accidisse judico, quòd *1533* & coætaneos habuerit, paulo post, & sequenti nimirum anno *1533* natos, sereniss. reginam Angliæ, dominam ELISABETHAM, filiam Henrici V III, cujus semper honos, nomen laudesq; manebunt, quòd veritatem purioris & sincerioris religionis amplexa, non ignara mali, ut de Didone, regina Carthaginensium, Virgilius refert, miseris, & propter ejusdem religionis confessionem nunc tot annos plus quàm Scythico more oppressis, trucidatis & profligatis, & propemodum à toto mundo neglectis & desertis, Belgis & Gallis succurrere, & suppetias & auxiliares manus ferre didicit; & laudatissimæ memoriæ GULIELMUM, Principem Auriacæ, & Comitem Nassoviæ; quorum utrumque summo honore & amore, donec vivebat, prosecutus est, & ab iisdem vicissim in magno est pretio habitus & redamatus. Et memini illum non tantum in profusas lachrymas erumpere, quotiescunque recordabatur perfidæ cædis in Auracico Principe commissæ, sed illi hoc quoq; testimonium perhibere, quòd nullus Principum hac nostra ætate;



tantos labores, impensas & pericula, in afferenda & defendenda sinceriore religione, impendisset, sustinisset, atque exantlavisset, quàm Princeps AURAÏCUS; unde etiam filiam AURAÏCAM ante paucos annos in BELGIUM ad fratrem, Principem MAURICIUM, & sorores abeuntem, me præsentem inter alia his verbis consolabatur, quòd si provinciæ BELGICÆ beneficiorum ab ipsius parente, inclyto illo HEROË, ut eum appellabat, acceptorum immemores forent, Deum tamè propter præclara & egregia merita parentis, Ecclesiæ & Reipub. Christianæ præstita, sibi suisque non defuturum.

Quia verò Illustrissimus defuncti nostri herois pater Landgravius PHILIPPUS, laudatissimæ memoriæ, prout Princeps fuit non tantùm fortis & bellicosus, verùm etiam prudens, optimè intelligebat, sine literis neminem veram cognitionem rerum & sapientiam consequi posse, & nulli magis, quàm Principum liberis, doctrina & bonarum artium scientia opus esse, imò nullum esse, quem vel plura vel meliora scire oporteat, quàm Principem, cujus doctrina omnibus subjectis prodesse debet, ut Vegetius de re militari inquit: nihil prius habuit, quàm ut hunc majorem natu filium, sicut etiam alios suæ Celsitudinis filios, in bonarum artium studiis, & in primis in pietatis doctrina rectè & quàm optimè institui curaret. Judicabat enim optimus & inclytus parens Landgravius PHILIPPUS, non satis esse, ut illius filii solummodò equitare, & ferè nihil aliud bene & præclare discerent, sicut ferunt Carneadem, virum sapientem, olim de Regum & Principum filiis dixisse; sed ut vera pietate, eruditione, sapientia & omni virtute animi illorum expolirentur, & ad gubernationem ita prepararentur, ut paulo post piè & sapienter Rempub. administrarent, inque patris crescerent munia magna sui. Unde hic noster Princeps GULIELMUS à primis quod ajunt annis, bonis literis & quidem in hac ipsa Academia summo indefessoque studio operam dedit, & ejusmodi in iis progressus fecit, ut non tantùm linguam Latinam quàm opti-  
mé

me calleret & intelligeret, verum etiam ubi opus esset, & inprimis cum doctis & literatis, illam fari posset; longè hac in parte felicior primo Duce Wirtenbergenſi Eberhardo, quem in Conventibus Imperii, & profectioibus Italicis, & aliis, graviter iratum tutoribus ſuis fuiſſe ferunt, quòd adoleſcentem Latinam linguam doceri prohibuiſſent; imò & Carolo v. Imperatore, qui cum Genua in Italia, elegantiffima & exquisitiffima oratione Latina nomine Senatus iſtius Reipub. exceptus fuiſſet, graviter ingemuit & deploravit, quòd præceptor ſuo non morem geſſiſſet, & linguam Latinam rectius & exactius addidiciſſet, ut vim & lumina verborum illius orationis aſſequi potuiſſet. Et magnam in Principe noſtro GULIELMO ingenii vim & heroicam indolem fuiſſe, vel inde etiam apparet, quòd tantopere ſtudiis mathematicis non tantum delectabatur, ſed tam præclara quoque in iis fundamenta jecerat. Ut enim ſtudio mathematico olim maximi reges non ſolum voluptatis cauſa, ſed quòd ad conſilia rerum gerendarum hoc conducere arbitrabantur, dediti fuere; unde Homerus in clypeo Achillis ſydera pingens, & cœli verticem & motum deſcribens, nihil aliud ſignificare voluit, quam harum rerum inquisitionem ſummis heroibus dignam eſſe: Et non tantum apud Græcos, Atlas, Orion, Chiron, Hercules & Solon, & apud Romanos, Julius Cæſar, Auguſtus, Theodoſius hæc ſtudia coluerunt, ſicut & Jopas apud Virgilium in regio convivio canit errantem lunam ſoliſque labores: verum etiam Alſonſus Luſitaniæ Rex, tantum lucis huic arti attulit, ut nomen ejus propter tanti beneficii memoriam omnibus eruditis & prudentibus gratiſſimum & chariſſimum ſit; cum huic præcipue debeamus, quòd extat adhuc erudita anni deſcriptio, & quòd non prorsus ignoramus ſolem, ut apud Homerum Cymmerii: ſic noſter Heros multum ſtudio & operæ in addiſcendis mathematicis poſuit, in quibus etiam tantum profecerat, ut non ſolum cum artificibus de motibus ſtellarum conferre poſſet, ſed etiam instrumenta ad obſervan-

dos motus sibi ab ipsis fabricari curaret; sicut meminimus illius Celsitudinem nō tantū D. Victorinum Schönfeldium, verū etiam magnum illū virum D. CASPARUM PEUCERUM, propter hæc ipsa studia mathematica in magno honore & pretio habuisse, nō aliter, quā sicut Rex Ungarię Matthias, quamvis nemo Principum ejus ætatis bellicosior erat, Joannis Regiomontani summi mathematici sermone & familiaritate delectatus fuit, ut quoties ex urbe Vienna eum in vicinam aulam suam evocaret, & mensæ suæ adhiberet, nō tantū multa de motibus syderum, & variis naturæ partib. ex eo sciscitatus sit, sed instrumenta etiā ad observandos motus cœlestes sibi ab ipso confici curaverit, & pensionem annuam ducentos aureos Ungaricos dederit, & multos alios viros doctos & mathematicum cultores ad fastigia amplissimorum honorum evexerit.

Anno deinde 46, quo ipso die obiit D. Martinus Lutherus, sub initium belli, quod vocāt, Schmalcaldici, ubi nimirum magnanimus ille Heros Landgravius PHILIPPUS, cum Duce Johanne-Friderico, Electore Saxonie, & aliis confœderatis, pro defensione tam religionis sincerioris, adversus Antichristi Romani impiā & impuram doctrinā, cum internecone & everfione totius Germanię conjunctam (sicut Pontifices Romani cum suis aſſeclis jam multos annos nihil aliud quā sanguinem illorum, qui ab impia Ecclesię Romanę doctrina defecerunt, sitiverunt, & adhuc immani odio sitiunt) quā cōservandæ etiam libertatis Germanię causā, contra Carolum v. arma sumsit; priusquam finibus suis exiret, hunc suæ Celsitudinis natu maximum filium GULIELMUM Argentoratum misit; ubi similiter aliquandiu bonis literis incubuit, & sub præceptore Garnerio Gallo simul rudimenta linguæ Gallicæ addidit.

Cū veró anno subsequente Dux Saxonie Elector, vel minus cautus, nimisq; securus in tam arduo negotio atq; bello, vel aliorum consiliis rationibusq; inductus, vel quocunq; tandem fato, celeritate & vigilantia, nec non fervore quodam adversariorum,

riorū, in sylva Lochana tribus trans Albim milliaribus, oppres-  
sus victusq; , & fusō nec non profligato cæsoq; exercitu, fortissi-  
mé pro sua salute dimicans, neq; á suis recedens, vulnereq; ad-  
verso graviter fauciat, in potestatem Caroli V. Imperatoris ca-  
ptus pervenisset; & Landgravius PHILIPPUS pauló póst sum-  
ma cupiditate ubiq; stabilis & certę pacis, autoribus potissimú  
Principibus, Electore Brandeburgensi, & Duce Mauricio, gene-  
ro suo, sese & ipsum, facta deditioe, Imperatoris fidei permisisset,  
& ad Imperatorem in urbem Salinarum Saxonicarum ac-  
cessit, ibidem (quod neque ipse tum metuebat, neque quis-  
quam eorum, qui pro illo deprecati, ipsi persuaserāt, ut clemen-  
tiam potius Imperatoris semel, quám iterum vim & arma expe-  
tīri vellet, suspicatus fuerat, quiq; sané cunctantem eum in tales  
angustias deduxerant) in custodiā daretur & duriter haberetur,  
parumq; liberaliter humaniterq; tractaretur: Hic noster Prin-  
ceps GULIELMUS, uti erat naturá φιλόσοφος, nihil prius habuit,  
quám ut quas posset rāiones iniret, quibus optimum parentem  
ex illis vinculis liberaret, atq; ita debitam gratiā pro nutritio-  
ne parenti referret, cū secundum Euripidē, *ἐκ ἐστὶ παιδὶ τέτυκτο κἀλλ-  
κιοι γέρας, ἢ πατρὸς ἐδολὸν ἢ ἀγαθὸν σφευκέναι, ἢ τοῖς τεκόνσιν ἀξίαν τιμὴν νέμειν*,  
Non liberis sit pulcrius munus aliud, quám liberos dici parentis  
optimi, parentibusq; dignum honorem reddere.

Et cū illustrissima ejus mater CHRISTINA, illustri Saxo-  
num sanguine nata, & filii, & quidam delecti cōsiliarii, subito ad  
omnes Principes & Ordines Imperii scriberēt, eosq; rogarēt, ut  
pro marito & liberorū parente apud Cæsarem intercederent, &  
omne studiū eó cōverterent, ut quamprimú libertati restitu-  
tus, domum rediret, & optima Landgravii Philippi conjunx,  
eius rei cōficiendæ causâ, ipsa Augustam abiret, & Principes sol-  
licitaret, ut pro marito intervenirent, verum nihil proficeret,  
sed Landgravius PHILIPPUS in quintum annum captivus  
detineretur; interea veró temporis, anno nimirum 49, inclyta  
ejus uxor, multis afflictā curis atque mœrore, é vita decederet:

Illustrissimus noster Princeps GULIELMUS non desistit apud  
 Ducem Mauricium, & Marchionem Brandenburgicum, Ele-  
 ctorem instare, & hoc urgere, ut ratione sponsonis, & obligatio-  
 nis, sibi suisque fratribus præstitæ, patrem liberarent & restitu-  
 erent, aliosque Principes rogare, ut pro illius liberatione denuo  
 apud Cæsarem intercederent. Qui cum hac de re anno 51 suos  
 legatos ad Cæsarem misissent, & illi aliquanto diutius eman-  
 erent: noster heros pertæsus illius moræ, ipsemet ad Ducem  
 Mauricium proficiscitur; & quoniam intercessionis spem sibi  
 fecisset, & verò nunc aliquot menses essent elapsi, postquam le-  
 gati iter ad Cæsarem fuissent ingressi, quid actum sit exquirat.  
 Qui cum illi respondisset, quod legati Regis Daniæ tardiùs non-  
 nihil, & tunc primùm advenissent, quando jam Cæsar Augusta  
 OEnipontem concessisset, & propterea moram intervenisse;  
 deinde Cæsarem colloquium illius expetere, eoque patris sui  
 liberationem differre; & quamvis sibi grave esset, hoc tempo-  
 re finibus suis exire, tamen quod ista causa vehementer & in-  
 primis afficeretur; eò proficisci, acceptis tamen primùm a Cæ-  
 sare literis, planè constituisse, diceret. Landgravius GULIEL-  
 M US, pro insigni erga patrem charitate, hoc incertum & du-  
 bium esse responsum, inquit, neque se videre quid sit ampliùs  
 expectandum; parentis interea miserabilem esse fortunam, qui  
 moerore & squalore carceris contabescat; cui cum nulla ratio-  
 ne Dux Mauricius, cum ratione officii, tum etiam promissi, de-  
 esse posset, idcirco operam dare, & hoc urgere & efficere vel-  
 let, ut intra definitum tempus, & brevi quidem, apertè respon-  
 deretur. Tandem inter illos secretè convénit, quod hic patrem,  
 ille socerum, armata potius manu é vinculis liberare; & Cæsa-  
 ri extorquere vellent, quam pati & ferre, ut diutius in carce-  
 ris squalore detineretur. O maxima rerum, & meritò pie-  
 tas homini tutissima virtus, non minùs in hoc utroque Prin-  
 cipe, quam illis duobus Catanæis, Philonomo & Callia, lau-  
 danda & celebranda! qui cum mons Aetna ignes in urbem Ca-  
 tanam

tanam eiecisset, & alii relictis parentibus fugerent, ut suas opes efferrent,

*Illis divitiæ sola materq; paterq;  
Hanc rapiunt præadam, mediumq; exire per ignem  
Ipso dante fidem properant.*

Unde postea:

*Erubere pios juvenes attingere flamma,  
Et quacumq; ferunt illi vestigia, cedunt.*

ut Virgilius hanc historiam in Aetna recitat.

Et cum omnes homines natura libertati studeant, & conditionem servitutis oderint, ut Cæsar de bello Gallico inquit; imò libertas sit res inæstimabilis, & omnibus rebus favorabilior, ut Jurisconsulti nostri loquuntur; unde etiam Diodorus Siculus valde iniquum esse ait, ingenuorum corpora, ad tuendam Rempub. destinata, magno salutis & incolunitatis publicæ detrimento, nexibus servitutis irretiri; & publicè intersit, ne liberi homines a quoquam retineantur: illi factò cum Rege Gallia foedere, & collectis copiis ex milite tunc temporis post dedicationem urbis Magdeburgensis dimisso, magnis itineribus de improvise, celeriusque omnium opinione Augustam Vindelicorum contendunt; cujus urbis cives, cum se suaque omnia in fidem ac potestatem Ducis Mauricii & sociorum permisissent, & imperata facere promississent: exinde Alpes petunt, & restat Fieffam, quod est in Alpium aditu positum oppidum; ad Loechum flumen, contendunt, & profligato Cæsariano milite, & iis, qui prope Rutam castra fecerant, ad mille partim captis, partim interfectis, partim in Loechum præcipitatis, ad arcem Erebergum pergunt; qua capta & occupata, Zirlam, quod duobus non magnis milliaribus ab OEniponte abest, petunt. Quod cum Cæsar cognovisset, maxima celeritate tumultuariè OEniponte, cum fratre Ferdinando, qui persuadendæ pacis causa eó venerat, discedens, & per Alpes, qua Tridentum itur, ad lavam deflectens, Villaçum, quod est in Carnis oppidum, ad Dravum

flumen sese recepit. ubi veró Dux Mauricius, & Landgravius Gulielmus, postea cum sociis OEnipontem venerunt, quicquid ibi repertum est Cæsaris & Hispanorum, & Cardinalis Augustani, direptum fuit; Ferdinandi autem Regis atque civium bonis nihil dampni datum.

Cúm veró Rex Ferdinandus jamdudum de pace apud Electorem Mauricium egisset, & triduum solum reliquum esset ad inducias, quas futuræ transactionis causâ constituerat: Dux Mauricius Passavium, ad Danubium flumē situm oppidum, petit; Landgravius veró Gulielmus & socii, idem quâ venerant iter ingressi, Fieflam revertuntur, & exinde cum omnibus copiis ad Eistetum, quod est Bavariæ finitimum oppidum Episcopale, castra ponunt; & interea temporis tam suo quâm Mauricii nomine literas Augustæ evulgant, quibus omnes ministros Ecclesiæ atq; ludimagistros, ab adversariis propter religionē, ut vocant, Augustanæ Confessionis ejectos & exterminatos, revocant & libertati restituunt, iisq; injungunt, ut nō solum in urbe Augustana, verum etiā aliis in locis, prout esset illorum vocatio, verbum Dei purē, juxtaq; Confessionem ibi olim exhibitā, docerent, & rectē pieq; juventutem in literis erudirent, illorum Principum consilii tutela & patrocinio; Et exinde motis castris Rotenburgum, quod est ad Duberum flumen Franconia vicinum oppidum, progrediuntur.

Interim Elector Mauricius Passavii præter soceri sui Landgravii Philippi liberationem, duo potissimum agebat & urgebat; unū, ut iis de rebus, quæ Germaniæ libertati nocerent, Ferdinandus Rex, & Maximilianus filius, & intercessores jamjam cognoscerent, & ex legibus & pro consuetudine Germaniæ de iis pronunciarent: alterum, ut religioni pax daretur, nec ulla cuiquam eo nomine, dum integrē tota controversia esset conciliata & decisa, molestia aliqua fieret. Verum quia Cæsar in plerisque non assentiret, & Rex Ferdinandus se offerret, quod hac de causâ ad Cæsarem fratrem ipse magna celeritate contendere, atque

re, atque ei omnia, quæ ad pacem spectare viderentur, persuadere vellet; & idcirco Mauriciū rogaret, ut ejus temporis quod itineri dandum esset, octo videlicet dierum saltem moram leniter ferret, ipse verò hoc recusaret, & confestim ad Landgravium Gulielmum, & alios socios, qui tumi Mergenthemii ditionis Prussiæ Magistri oppidi, castra haberent, rediret, exinde ne in tali rerum dubio statu nihil agerent, & quòd Cæsaris præsidium, septendecim nimirum signa militum, & equites ad mille, Francofurti essent, & hisce terris inde non parvum discrimen immineret, eò per agrum Episcopi Moguntini contenderunt, eamq; urbem obsidere cœperunt.

Quia verò interea temporis Cæsar se apud fratrem Ferdinandum declaraverat, ut nimirum de rebus Imperii, quas proposuisset Mauricius, non à delectis aliquot separatis, sed ab universis Ordinibus in proximo Conventu Imperii cognosceretur, ad quem usq; similiter causa religionis pacata maneret, & quod in eodem Conventu de cōmuni Ordinum consilio ex re & salute Reip. profuturum esse statueretur, ratum atq; firmū haberetur. Rex Ferdinandus subitò ad Mauriciū & socios, Bohemiæ Cancellarium, Henricum Plauensem, Misniæ Burggravium, in castra ante Francofurtum mittit, qui hac de re ad illos referret, eisq; pacem, cū ob periculum, quod eis à Cæsare, qui jam firmissimum exercitum haberet, incumberet, tum & in quantum discrimen potissimū Landgravius Gulielmus & parentem captivum, & omnem provinciam Hassicam, adducturus esset, persuaderet. Quam cū Dux Mauricius & Landgravius Gulielmus admisissent, & relicta obsidione se Passavium contulissent, altera die Augusti, anno 1552, tandem inter alia salutariter & feliciter est transactum, ut Landgravius Philippus custodia penitus liberaretur, & tutò certoque extra periculum liber sisteretur; sicut & postea quarto die Septembris dimissus, domum sexto die post, & quidem non sine magno gaudio & applausu tam liberorum, quàm etiam nobilitatis &



rotius sui populi Hassiaci, reversus est, & simul Dux Saxoniae Johannes-Fridericus est liberatus; & ut deinde, intra dimidii anni spacium, Comitata haberentur, in quibus, qua via quibusq; modis, nimirum vel generali, vel nationali Concilio, aut Colloquio, vel communi etiam Imperii Conventu, Religionis discordia commodè atque compendio sopiretur, & quantum fieri posset, ad unionem & concordiam piam & Christianam redigeretur, atque ejusmodi conciliatio religionis ab omnibus sacri Imperii statibus seu ordinibus, mediante Caesarea Majestatis ope praesidioque, pertractaretur: Nec interea Caesarea, vel Regia, Majestates, nec Electores, Principes, & sacri Imperii status, quem piam ex Augustanae Confessionis ordinibus, propter religionem vi factove, aut aliàs contra ejus conscientiam & voluntatem cogere, aut ea de causa vi bellove petere, vel invadere, vel oppugnare, eique damnum aliquod inferre, sive per mandata, sive aliquo quovis modo ipsum gravare, vel etiam contemnere deberent, sed sua religione, & fide, quietè & pacificè uti frui permetterent; & quicquid in illis Comitibus, communi ordinum consilio, & interveniente Caesaris autoritate, decerneretur, in posterum firmum atq; ratum esset, neq; in contrarium, aliave via diversum quicquam ageretur.

Ajunt, nihil saevius & ferocius esse pantheris, & tamen leguntur saepe in circo, cum reverentia quadam, non secus sicuti ferox ille leo, de quo ex Appione Polyhistor Gellius refert, Romae in circo maximo, servo Androdo pepercit, sanctis pepercisse. Has superat rabies Pontificum Romanorum, qui adeo non parcunt ullis, ut civile bellum accendi, & tot nationes, Germanicam, Belgicam & Gallicam deleri, tot honestas matronas, tot infantes jugulari, & vastitatem Ecclesiarum effici cupiant aeternam. Hac igitur salutari Ducis Mauricii Electoris & Landgravii nostri GULIELMI expeditione, memorabili sane ad omnem posteritatem exemplo, & victoria, non tantum captivus illorum socer, & pater, jure quasi postliminii, pristinae

stinæ libertati est restitutus, verum etiam PAX SACRA, sive  
 RELIGIONIS, ut vocant, impetrata, & Cæsari propemodum  
 extorta, & isti negotio & bello, cum perpetua illorum laude &  
 gloria, talis finis impositus, ut ab eo tempore rabies Pontificum  
 Romanorum, & eorum satellitum, in Evangelicos, ut vocant,  
 cessaverit, & pax & tranquillitas in Imperio sit hactenus conser-  
 vata; sicut hæc ipsa pax, in Comitibus Augustanis anno 55 post  
 subsequutis, publico decreto est confirmata, ne videlicet pro-  
 pter Augustanæ Confessionis doctrinam, fidem atque religio-  
 nem, Cæsar, Ferdinandus Rex, cæteri que Principes ac Ordines,  
 quenquam totius Imperii, quocunque modo violarent, nec  
 ad deserendam suam religionem, cæremonias atque leges, quas  
 in sua ditione vel jam instituissent, vel posthac instituerent  
 Confessionis Augustanæ socii, mandatis aut alia quavis ratio-  
 ne cogere, neque contemnerent etiam, sed hanc religionem  
 illis liberam permetterent, simulque bona, facultates, vectiga-  
 lia, possessiones, atque iura, sic ut pacatè possent eis uti frui; dis-  
 sidium quoque religionis, non aliis, quam piis, amicis & tran-  
 quillis rationibus componeretur. Et eodem modo, qui sunt  
 Confessionis Augustanæ, sese erga Cæsarem, Ferdinandum Re-  
 gem, cæterosque Principes ac Ordines, antiquæ seu Romanæ  
 religioni conjunctos, tam sacros, quam civiles, & erga cæteros  
 omnes Ecclesiastici Status, eorumque collegia gerent. Ita ut  
 proximè, & secundum Deum, Electori Mauricio, & nostro illu-  
 stri Heroi, Domino Landgravio GULIELMO, hoc potissi-  
 mum omnes acceptum debeamus, quod illorum magnanimitate,  
 fortitudine, ope & auxilio, ejusmodi pacem sacram obti-  
 nuerimus, qua licet adhuc fæces & reliquiæ Papatus, apud non-  
 nullos Status Imperii, & in illorum ditionibus, sint conservatæ:  
 aliis tamen statibus & ordinibus Imperii, qui à Romana Eccle-  
 sia discesserunt, ita profuit, ut ab eo tempore securè & quietè  
 vixerint, & nemo contra dispositionem illius pacis sacræ ha-  
 ctenus, intuitu religionis, vel in persona, vel rebus, à quoquam

turbatus, aut molestatus fuerit. Et cū in illa pace sacra, inter alia quoque hoc sit constitutum, ut si quis Archiepiscopus, Episcopus, Antistes, aut alius ordinis Ecclesiastici, à religione veteri (ut vocant) Romana, & Pontificia nimirum, deficeret, is continuo ab Episcopatu suo, præfectura, beneficio, simul omnibus etiam fructibus, quos inde percepisset, decederet: quod ipsum tamen ad nullam ejus infamiam cedere, vel pertinere deberet; & collegio, sive iis, ad quos ea res jure, vel consuetudine pertinet, liceret & integrum esset, in ejus locum eligere, & constituere alium, qui veteris esset religionis, & hoc potissimum eum ob finem, quo nimirum institutionis, electionis, præsentationis, confirmationis, & id genus alia jura, simul cum tranquilla, & quieta possessione bonorum Ecclesiasticorum, illis integra permanerent: sic tamen ut futuræ conciliationi religionis, de qua dictum est, hoc ipso nihil detraheretur; Hac verò dispositio sociis Augustanæ Confessionis displiceret, idcirco contendebant, omnibus indifferenter licere, ipsorum doctrinam sequi, & pacis beneficium illis esse communicandum, eò quod promissiones Dei, tam veteris, quam novi Testamenti, quæ salutem nostram continent & complectuntur, ad omnes homines pertinerent; itaque ipsis non licere illas certis finibus includere, vel in angustias redigere, ne hac ratione & alios & semetipsos à regno cœlorum excluderent. Et nullum esse Judæum, vel Turcam, ita affectum, qui non velit omnes à se posse in suam religionem adduci; quanto magis ergo oporteret eos idem facere, quibus hoc à Deo gravissimè, & ferriò, esset præceptum & mandatum? Libertatem itaque omnibus hac in parte esse concedendam, & se ex sacris literis, & decretis Patrum atq; Conciliorū, docere posse, quemadmodū hi, qui veteris & Catholicæ religionis titulum sibi sumerent & vendicarent, non absque magna Dei contumelia, religionem tractarent, & bonis Ecclesiarum abuterentur: Veruntamen pacis causa permittere velle, ut suas leges, ritus & cæremonias illi retine-

retinerent, & omnibus bonis, possessionibus, vectigalibus, jure, privilegiis, uterentur fruerentur, quoad religionis dissidium componeretur. Nullo autem modo se posse ferre vel probare, quod Episcopis Augustanam Confessionem amplecti volentibus, ejusmodi duram conditionem prescribere vellent: sic enim futurum, ut suæ nimirum religionis approbatores & socios oppugnare tenerentur, & magno cum dedecore, & infamia, totam suam causam ipsi damnare; cum hoc esset fateri, doctrinam & religionem eorum, non esse dignam sacris bonis, & huc usque perperam ea bona suis Ecclesiis ministrisque fuisse applicata; imò faterentur, doctrinam adversariorum impiam & impuram niti verbo divino, & bona sacra esse simul huic ipsorum impuræ vitæ, legibus, atque ceremoniis consecrata ne dicerent, quantam ea res paritura esset offensionem, si causam eorum, & facultates, tuerentur, qui nullum Ecclesiæ vel utile, vel necessarium officium præstarent, & illos proderent, qui propter eandem religionem sibi quam commendatissimi esse deberent. Adversariis autem contranitentibus, & Episcopum, vel Abbatem, religionem mutantem, ipso jure & facto, sine prævia causæ cognitione, loco moveri volentibus, & alium substitui; inter alia etiam hoc adjicientibus; siquidem Ecclesiasticis religionem mutare concederetur, futurum, ut Episcopatus, & id genus alia collegia, prophanarentur, & ab Ecclesiis avulsa, paulatim in manus Principum devenirent, iisque hereditaria fierent: Hoc verò Augustanæ Confessionis socii, nunquam sui consilii fuisse, verum eò spectare dicerent, ut collegia sacra, ad pristinam institutionem revocata, veris usibus accommodarentur, & in perpetuam ea bona iis Ecclesiis manerent annexa, & ne dubitationi ullus relinqueretur locus, idoneè cavere promitterent, fore, ut quibus in Episcopatibus & Collegiis religio mutaretur, ex bonis illorum nihil alienaretur, utque post ejusmodi Episcopi, vel Antistitis, mortem, aut resignationem æque libera permitteretur Collegiis tum electio, tum admini-

stratio. Tandem cum post variam actionem inter illos hac de re convenire non posset, Rex Ferdinandus nihilominus eam sententiam, ut si Episcopi religionem mutarent, ab administratione simul & bonis decederent, approbavit, & Augustanæ Confessionis socios, ut assentirentur, multis verbis hortatus est. Cui cum assentire se non posse palam declararent, & illam particulam omitti à Rege Ferdinando denuo peterent; ille verò nihil amplius posse tribui responderet, & ea diceret nunc eis concedi, quæ tot annis nunquam impetrari potuissent, idcirco, ut acquiescerent, illos moneret, alioquin futurum, ut nulla re perfecta, ex Comitibus discederetur, & si quid incommodi inde suboriretur, non esse, quod vel in Cæsarem, vel in se, posthac ullam culpam transferrent, qui tam leniter & patienter causam hanc tractasset: factum est, ut cum neque Cæsari, neque Regi Romanorum, modum aliquem hac in re Augustanæ Confessionis sociis præscribere liceret, Rex Ferdinandus ad extremum, proprio motu, hanc particulam, ut nimirum Ecclesiasticus, qui religionem mutaret, beneficio suo multaretur & privaretur, paci sacræ inseruerit. Cui tamen nihilominus Confessionis Augustanæ socii, non tantum est vestigio, verum etiam in aliquot subsequentibus Comitibus, denuo contradixerunt, & palam tam voce, quam scriptis protestati sunt, quod eam sententiam neque approbassent, neque unquam approbare, vel eam amplecti possent. Et hinc illa lerna & Ilias malorum originem habet, & adhuc durat, quò minus stabilis & firma consensus animorum, inter Status, vel Ordines Imperii, sanciri vel conservari possit, priusquam libertas religionis etiam in dioecesibus Papisticis, ut vulgò vocantur, concedatur, & non minus Augustanæ Confessionis socii, quam alii Romanæ religioni addicti, in iis ferantur, & ad æqualia beneficia & dignitates earundem admittantur.

Si igitur votis quicquam proficere possemus, optandum esset, ut non tantum politici & seculares, verum etiam Ecclesiastici

ſtaſtici Status Imperii, Pontificiæ religioni adhuc addicti, ſeriò cogitent & perpenderent, in quæ tempora inciderimus, & quàm miſerabilis hodie ſit facies Romani Imperii, & quid iifdem & nobis omnibus, in eo indies, cùm ab irruptionibus barbaricarum gentium, & Turcis, tum etiam inteſtinis diſcordiis, ſingulis propemodum horis & momentis ſit metuendum & expectandum, & propterea tantò majore cura in eam rem incumbere, hoc agere, hoc curare, & perficere, ut in honorem Dei, & propagationem illius divini nominis, deinde etiam propter ſalutem publicam, non tantùm horrendi illi abuſus & idololatriæ, jam tot annos in Eccleſiam Romanam invectæ, aliquando ex Eccleſiis Pontificiis exterminarentur & abolerentur; verùm cùm tot jam ſint Principes, Comites, & Nobiles, qui ab idololatricis cultibus in Papatu abhorrent, illi non minùs, quàm qui adhuc illis aſſentiuntur & adhærent, ad diœceſes & collegia ſacra, nec non illorum commoda & dignitates admitterentur, & ut iis uti frui poſſent, permitteretur, cùm alioquin impoſſibile ſit, ut diſſidentibus animis in religione, vel nò æquè iis, qui ſinceriori religioni ſunt addicti, ad beneficia, & dignitates diœceſium, quàm aliis admiſſis, ulla conjunctio animorum & concordia in Imperio ſit ſperanda, vel expectanda, tantum abeſt, ut ulla firma & ſtabilis pax & tranquillitas poſſit ſanciri & ſtabiliri.

Ex iis igitur, quæ haſtenus ex hiſtoria Ducis Mauricii & Landgravii GULIELMI, retulimus, videre licet, quantæ curæ utrique huic Principi fuerit, religionem promovere, & eam in Imperio ſtabilire. Reſtat nunc, ut reliqui Status Imperii huic rei colophonem, vel ſummam, quod dici ſolet, manum imponant & adjiciant, præſertim cùm res jam eò devenerit, ut non tantùm plerique Episcopatus, in urbibus maritimis, & verſus ſeptentrionem ſitis, ſint reformati, verùm, etiam unus atque alter Episcoporum, paulò ſuperioribus annis apud Rhenum, religionem mutare cœperint, & pleriq; Capitularium in non-

nullis diœcesibus apud Rhenum, Augustanæ Confessioni, seu puriori & sinceriori religioni sint addicti: Et hac ratione, hic casus in pace sacra sit omissus, & non decisus, idcirco dispositioni omnium Ordinum Imperii adhuc subjacet, qui inter se convenire, & apud Cæsaream Majestatem hoc agere & impetrare possunt, ut sincera religio in omnibus diœcesibus admittatur, & earatione ubivis locorum in Imperio salutaris pax & concordia sanciat & constituatur, quam tantó magis omnes expetere & promoveri debent, quó omnes res pace crescant & floreat, bello veró, & discordia, dilabantur, imó sit, secundum Silium Italicum,

*Pax optima rerum,  
Quas homini novisse datum est, pax una triumphis  
Innumeris potior, pax custodire salutem,  
Et civis equare potens.*

Et deceat, potissimum nos Germanos, concordia, non tantum quod homo etiam exterus, civis Atheniensis, Chalcondylas, adhuc ante paucos annos majoribus nostris hoc testimonium tribuit, Nullam se nosse gentem, cujus mores sint honestiores, quæ si concors esset, esset invicta: sed ut tantó etiam cõjunctiores & acriores in defensione patriæ contra Turcas, & aliarum barbaricarum gentium incursiones & irruptiones esse possimus.

Et cum in supra memorata transactione Passaviensi, inter alia quoque ordinatum & dispositum fuerit, ut in controversia illa, de Comitatu Cattimelibocensi, inter illustrissimos Principes D. PHILIPPUM, Landgravium Hassiæ, reum conventum, & GULIELMUM, Principem Auraicæ, & illius illustre & generosum patrem, WILHELMUM, Comitæ Nassoviæ, &c. actores, a parte Nassaviensium, durante Landgravii custodia, impetratarum & promulgatarum sententiarum executio suspenderetur & differretur, donec Landgravio PHILIPPO liberato, amica inter partes transactio institui agique posset; & sin minus ea locum haberet, vel inveniret, Landgravio tamen, prout equitati consentaneum esset, sua

sua testimonia, literarum documenta, aliaq; necessaria, quæ ad-  
 vocatorum huc usq; defectu, durante custodia proferrî non po-  
 tuissent, de cætero exhibere & producere liceret; & propterea  
 Principes mediatores & pacificatores sub finem anni 55, sicut  
 constitutum erat, Wormaciæ convenissent; eidem diatæ illu-  
 stris heros noster Landgravius GULIELMUS, nomine & loco  
 parentis sui Landgravii PHILIPPI, interfuit. Sed cum re in-  
 fecta discederetur, tandem hæc controversia, qua sanè nulla un-  
 quam in Germania extitit illustrior, gravior, & magis diuturna,  
 siquidem ad quinquaginta propemodum annos disputata & ven-  
 tilata, Francofurti ad Moenum, 30 die mensis Junii, anno 1557,  
 per illustrissimos Principes, D. Ottonem Henricum, Comitem  
 Palatinum ad Rhenum, &c. Dn. Augustum, Ducem Saxonie, &c.  
 Electores, Dn. Wilhelmum, Ducem Juliacensem, &c. & Dn. Chri-  
 stophorum, Ducem Wirtembergensem, &c. transactione felici-  
 ter & penitus hunc in modum fuit composita & sopita, ut casta-  
 tis omnib. diffinitivis & executorialibus in hac causa promulga-  
 tis, apud D. Landgravium Philippum, & ejus Celsi hæredes omnia  
 D. Principi Auricæ, & Comitibus à Nassau, adjudicata oppida,  
 castra, prædia, reliquaq; tam mobilia quam immobilia, rema-  
 nerent. Et Landgravius Philippus vicissim Principi Auricæ, &  
 Comitibus Nassoviæ, ad certos terminos, sexies centena millia  
 aureorum solveret. Cui transactioni postea ab utrisq; partib. est pa-  
 ritum, ita ut Landgravius Philippus, Principi Auricæ, & illius patri  
 Wilhelmo, Comiti Nassoviæ, quater centena & quinquaginta  
 millia aureorum in are numeraverit, & pro reliquis centenis &  
 quinquaginta millib. illis quartam partem Comitatus Dizensis,  
 cum confinibus castris & prædiis, prout Landgravii Hassiæ ante  
 hanc transactionem illa omnia possederunt, cesserit, & Princeps Au-  
 raicus, & Comites Nassoviæ, in posterum non minus se Comites  
 Cattimelibocenses, sicut etiã Landgravii Comites Dizenses scri-  
 berent, & signa seu arma gentilitia eorundem Comitatum in suis cly-  
 peis vel insignib. utrinq; gererent & retinerent; & sicubi domus



Hessiaca sine mascula sobole decederet, unus Comitatum Catimelibocensium, sive superior, ditionis Gerariæ, sive inferior apud Rhenum, familiæ Nassoviorum cederet, vel à successoribus domus Hassiacæ illi ter centena millia aureorum pro eo numerarentur.

Post liberationem vixit Landgravius PHILIPPUS adhuc 15 annos, & anno 1561, die 20 Junii interfuit Conventui Electorum & Principum Augustanæ Confessionis Naoburgi, in quo Imperatori Ferdinando, de Concilio recens à Pio Pontifice Medicæorum familiæ indicto responderunt, & denuó Confessioni Augustanæ, prout à PHILIPPO MELANTHONE, etiam vivente adhuc Luthero, fuit retexta & recognita, ipso Melanthono præterito anno nimirum 60 jam mortuo, subscriperunt. Et memoria dignum est, quòd cum in hoc ipso Conventu Dux Saxonie Johannes-Fridericus Vinariensis, instinctu Matthiæ Flacii Illyrici, ut plurimum urgeret, & apud reliquos Confessioni Augustanæ addictos Principes diligenter instaret & sollicitaret, uti nimirum recessui ibidem confecto & conscripto, in articulo de sacra Cœna Dominica, hæ particulæ *in, cum & sub* pane nos percipere corpus Christi, adjicerentur: illi tamen hoc facere recusarunt, atque eo ipso *anvortat* seu co-existentiam corporis in vel sub pane, sive consubstantiationem, ut vocant, pro qua tantopere adhuc hodie à nonnullis dimicatur, improbarunt. Postea Landgravius PHILIPPUS 31 Martii, die secunda Paschatis, anno 1567 moritur, ætatis 63, anno à captivitate vel custodia 20, à liberatione 15, gubernationis suæ 50, à morte Philippi Macedonis, cum quo Melanthon illum conferre & comparare, & subinde quoque in Epistolis suis ita eum appellare solitus est, 1901, quo ipso anno 13 Aprilis post die Dominico, qui dicitur Misericordia Domini, urbs Gotha & arx contigua Grimmenstein Commissariis Imperii & Electori Augusto, uná cum Duce Saxonie Johanne-Friderico est tradita, & arx solo æquata; Et Ferdinandus Dux Albæ cum exercitu

citu in Belgium venit, & gubernator Belgii á Philippo Rege Hispaniæ constitutus est, & horribilis illa laniena & persecutio illorum, qui purioris religionis in Belgio essent suspecti, Busyridis, Phalaridis, Neronis, Caligulæ & Domitiani tyrannidem & sævitiam longé antecedens & exuperans, cœpit; in qua non tantum sequenti anno 68 die 4 Junii, Princeps Egmondanus, & Comes Hornensis Bruxellæ capitis supplicio sunt affecti; verum Dux Albanus illo sexennio, quo clavum Reipub. in Belgio tenuit, quemadmodum ipse est gloriatus, plus quam octodecim hominum millia carnificis manu contrucidandos dedit & iussit, & cum Hispanicæ inquisitionis sanctis illis, si diis placet, patribus, vel hæreticæ pravitatis, ut vocant, inquisitoribus, non tantum de extirpandis é Belgio, verum etiam Gallia, & toto orbe Christiano, quotquot religionis essent suspecti, imó de subjiendo tyrannidi Hispanicæ toto Imperio Romano, consilia agitavit; unde adhuc illa malorum & bellorum in Belgio & Gallia calamitas, cum maximo detrimento & incommodo Imperii Rom. & ejus membrorum & subditorum, durat.

Cum autem plerunque fieri soleat, ut Principum familie ex æquali divisione bonorum, si non plané intercidunt, saltem ita attenuentur, ut pro dignitate statum & conditionem suam tueri amplius nequeant; unde avorum quoque nostrorum memoria, feuda dignitatum apud unum ex familia, præsertim seniorem, semper facta tectaque conservata sunt, quod prudenter considerârunt, nihil esse tam magnum, quod divisione parvum nõ fiat, ut inquit Imperator noster Justinianus in authent. de trient. & semiss. §. I. Landgravius PHILIPPUS, ut fuit Princeps prudens & providus (non obstante communi & veriore illa sententia & opinione Juris, quod filii æqualiter parenti in feudis, sicut & in bonis allodialibus, succedere debeant, & vasallus non possit disponere, quod unus filiorum duas partes habeat, alter tertiam, multo minus, quod uni totum feudum assignet, eo quod providentia legis seu consuetudinis feudalis

hoc privilegiū filiis præstet, ut æqualiter in iis omnes succedant; unde id quod lex alicui tribuit, non possit ab alio nisi ipsa lege auferri) non aliter quàm sicut Cyrus Rex Persarum, inter filios suos ante mortem disposuit, ut licet pari benevolentia omnes cõplecteretur, tamen penes Landgravium GULIELMUM maximum natu filium semisis seu dimidia pars bonorum illius remaneret. Cui dispositioni patris cum reliqui filii cõsentirent, & illam assignationem ratam haberent, & quilibet favori & juri pro se introducto renunciare possit, & alioquin vera sit sententia Baldi, quod feudum antiquum de voluntate & consensu reliquorum filiorum, per patrē uni ex filiis assignari queat: Landgravius GULIELMUS in media parte bonorum à patre relictorum successit, cum reliquis tamen suis tribus fratribus ita vivebat, ut sicut orbis cœlestes miris anfractibus sibi mutuò cedunt, ut suam harmoniam & concordiam eo quasi obsequio tueantur, sic ille cedendo, ferendo, & placidè contrà nitendo, concordiam & amicitiam cum fratribus coleret, servaret & retineret summā, & illi eum vicissim non tantum velut fratrem amarent, verum etiam quodam modo revererentur & observarent, ita ut nullæ propemodum similitudines inter illos unquam sint deprehensæ vel animadversæ: exemplum & præceptum illius Sciluri Scythæ, octoginta liberos masculos habentis, sibi proponentes, qui cum moritutus esset, fasciculum jaculorum singulis porrexit, & illum rumpere jussit; id cum singuli recusassent, eo quod impossibile videretur, ipse singula jacula exemit, atque ita facile omnia cõfregit, filios admonens his verbis: Si concordēs eritis, validi & invicti manebitis: contrā, si dissidiis & seditione distrahemini, imbecilles & expugnatu faciles eritis. quo sane Scythæ non magis Scythicè rem ob oculos ponere potuisset: imò Cyri Regis Persarum consilio obtemperantes, quod fieri non possit, ut qui eodem sanguine prognati, & ab una & eadem matre alti, iisdem in ædibus creverunt, & ab iisdem parentibus dilecti, eundem tum patrem tum matrem appellarunt, non omnium sint

conjunctissimi? ut apud Xenophontem in fine libr. 8. de institutione Cyri, hæc historia eleganter ad longum deducitur & commemoratur.

Cæterum in uxorem noster Heros habuit illustriss. Principem SABINAM, Ducis Christophori Wirtenbergici filiam, foeminam ut alto sanguine natam, ita lectissimam & in primis mariti observantissimam; in qua verè eluxerunt velut gemmæ, virtutes honesta matrona dignæ; pietas, modestia, gravitas, temperantia, sedulitas, liberalitas erga egenos & pauperes, & præcipuè summus & mirificus erga maritum & sobolem amor; quæ ei unicum filium illustrissimum & maximæ spei Principem Landgravium MAURICIUM, cum quatuor filiabus reliquit, & cujus præsentiam in viduo statu multoties expetere & requirere solebat, sæpè cum lacrymis repetens, quàm sibi chara fuisset, & quàm ægrè illa à sese fuisset avulsæ, & ipse illam, si DEO non aliter visum fuisset, amisisset; prout

*Non dolor est major, quàm cum vehementia mortis  
Unanimi solvit corda ligata fides;*

ut de orbitate conjugum gravissimè vir & poëta optimus Johannes Stigelius scripsit Ut enim nullum est arctius vinculum in genere humano, quàm dulcissimum foedus conjugii: sic homini *φιλοσβεργω* non posse tristius atque acerbius vulnus infligi judico, quàm cum vitæ sociam & costam corporis sui, sive ut veriùs dicam, partem animæ suæ amittere cogitur: ut sanè optimo Principi optandum fuisset, istam conjugem ei adhuc diutiùs superstitem fuisse, cum ingravescente ætate, sua comitate & mansuetudine multas ipsi curas & molestias lenire potuisset.

Cum autem in Ecclesia Deus disertè Principibus & Regibus populorum præceperit, ut librum legis divinæ, continentem normam veræ agnitionis & cultum Dei, & regulam consiliorum, actionumque vitæ, in gubernatione Reipublicæ & pri-

vatis moribus omnium, diligenter & assidue legant, discant, custodiant, dies & noctes meditentur, eamque normam in tota gubernatione & officiis omnibus erga Deum & homines sequantur, nec unquam ex oculis aut manibus recedere patiantur; noster heros à primis annis ita institutus erat, ut nullum propemodum diem prætermitteret, in quo non aliquem textum in sacris literis legeret & medicaretur, sicut ferme nulla pagina in illius Bibliis conspiciebatur, quæ non erat aliquoties pervoluta, & multa in ea vel in margine notata vel alioquin calamo signata. Juxta igitur hanc normam, suam gubernationem instituebat, ut non tantum puritatem verbi divini suis subditis proponi curaret, verum etiam, ut consensus doctrinæ, præsertim hoc tempore, quo tam varia certamina passim in Ecclesiis sunt mota, inter ministros suarum Ecclesiarum esset; & sicuti Ubiquitatem & Omnipræsentiam carnis Christi in articulo de persona Christi, & corporalem illam *συνωσίαν* & coexistentiam corporis Christi in pane, & oralem ejus manducationem in Coena, seriò, veluti non tantum verbo Dei, & articulis fidei nostræ, verum etiam toti orthodoxæ antiquitati omnibus temporibus contrariam & incognitam, & recens primum ab inquietis ingeniis in Ecclesiam introductam, improbabat, execrabatur & detestabatur, & in sacrosancta Coena, secundum sententiam Irenæi, duo credebat, rem terrenam, videlicet externa elementa panis & vini, quæ ore corporis, & rem celestem, corpus nimirum & sanguinem Domini, quæ virtute & efficacia Spiritus sancti sola fide percipiuntur; non quæ manibus sacerdotum tractantur, franguntur, & dentibus atteruntur, ut Berengarius coactus ad veræ sententiæ, quam antea professus esset, *σαλινοδίαν* sensit; non quæ (ut nonnulli dixerunt & scripserunt, Berengarii palinodiam approbantes) non tantum oraliter, verum etiam labialiter, dentaliter, & lingualiter; quæ Adverbia sunt ipso penè stupenda sono; sumuntur: Ita hoc unice curabat, cavebat & providebat, ne in suæ ditionis Ecclesias ta-

lia

talia commenta & traditiones hominum inveherentur. Et meminimus illum sapere ex animo deplorare & detestari, eó jam rem devenisse, ut in tanta luce doctrinæ cœlestis, qua veritas illius ne quidem tempore Apostolorum clarior affulsit & illuxit, cui libet feré liceret peculiare opinioniones de præcipuis religionis Christianæ capitibus fingere, & eas postea pro sacris oraculis in vulgus spargere, & ut iis omnes assentirentur, & fidem haberent, propemodum exigere & postulare; qui veró hoc facere recusarent, veluti anathematis fulmine percuterentur, & pro hæreticis haberentur; qualis tyrannis in Ecclesiis, nisi sub Papatu, nunquam fuisset audita vel animadversa; idcirco se mirari dicebat, quód talia deliria & commenta adhuc patronos invenirent, qui defensionem illorum susciperent, & aliis obtrudere conarentur; cum solam, summam & ultimam consolationem in omnibus miseriis & adversitatibus vitæ hujus, & præcipuè in morte, ex incarnatione Filii Dei haberemus, qui nimirum natus ex Maria virgine, verus homo factus esset, & precioso sanguine ejus redempti, Deo quæ fide reconciliati, atque uno Spiritu ipsi inserti & adunati, inchoata novitate ei hinc similes in natura humana efficeremur, caro de carne, & os ex ossibus ejus, & postea in illa æternitate, gloriosæ ejus carni conformati, summum ipsum ac prævium in carne nostra ducem ad patrem habituri essemus; quam consolationem portentum commentitiæ Ubiquitatis prorsus everteret & extingueret.

Deinde subditorum mores ita regebat, ut quantum fieri posset, cum norma legum honestarum congruerent, & suum cuique corpus & bona, voce legum, judiciis, & armis, si opus fuisset, adversus injurias defenderet, & contumaces & flagitiosos puniret, atque ita pacem publicam propter hunc finem conservaret, ut societas hominum civilis, tranquilla & incolumis servaretur, & Dei sapientia, bonitas & justitia, in legibus, judiciis, justorum defensione, & poenis sceleratorum, ab hominibus agnosceretur & celebraretur, & in pace vera de Christo doctrina late

spargi, Deo æterna Ecclesia colligi, & mores pié & modesté regâ  
& in summa, ut Apostolus inquit, subditi tranquillam & quie-  
tam vitam cum omni pietate & honestate sub illius imperio a-  
gere possent: unde meritó pro patre patriæ, vel potius familiæ, &  
bono Principe, qui secundúm Xenophontem, nihil differt á bo-  
no patre, & pro pastore populi, sub cujus arbore vel umbra sub-  
diti, ut apud Danielem bonus Princeps depingitur, pascerentur,  
á suis fuit habitus, agnitus & honoratus. Præterea in subditos  
non sæviebat, vel eos emungebat, vel immoderatis exactiõibus  
deglubebat, nec assiduus operis, ut non suppeteret eis tempus  
sefe & suos alendi, excruciebat, sed ita tractabat, ut nemo de  
ipsius sævitia vel immoderatis operis & exactiõibus quicquam  
meritó conqueri possit, imó omnes illius erga se benignita-  
tem & clementiam potius prædicent, & ad cœlos usq; tollant.

Et quemadmodũ Dux ille Thebanus Epaminondas, cum  
Thebani cives festis quibusdã diebus, solutiũs cõpotationibus  
indulgerent licentiusq; voluptatibus fruerentur, ille solus vi-  
gil ac sobrius lustrabat, & urbis moenia obambulabat, & rogatus  
cur id faceret, respondit, se *νῆθειν καὶ ἀγρυπνεῖν, ὅπως ἐξῆ τοῖς ἀλλοῖς με-  
θεῖν καὶ καθεύδειν*, se sobrium esse ac vigilare, quó reliquis liceret  
temulētis esse ac dormire, quemadmodũ Plutarchus in libello,  
Adversus imperitũ Ducem, refert; Et Virgilius suum AENEAM  
aliis dormientibus vel voluptati indulgentibus aut vigilantem  
facit, aut certé excitat, & cogitabundum, sobrium, & de futuris  
animo cogitantem fingit; ita noster Princeps non tantũ de sa-  
lute suorũ, verũ etiam communis patriæ, semper sollicitus, &  
nunquã minus ociosus erat, quã cum ociosus, nec minus so-  
lus, quã cum solus esset, sicuti testante Cicerone Cato scripsit,  
Publium Scipionem Africanum de se dicere solitum fuisse; un-  
de non tantũ exteri Reges & Principes, verũ etiam ipsi Im-  
peratores & Principes Germaniæ in gravissimis & dubiis rebus  
subinde ad illum, veluti sacram anchoram, confugiebant, &  
eum tanquam Apollinis aliquod oraculum vel tripodem con-  
sulebant.

Simi-

Simili ratione ut Aelius Lampridius de Alexandro Severo Imperatore scribit, quod ipsi consuetudo fuerit, ut si de Jure aut aliis negotiis tractaret, doctos & disertos adhibuerit, & negotia & causas prius á scriniorum principibus, & doctissimis Jurisperitis, & sibi fidelibus, quorum primus & præcipuus tunc Ulpianus Jurisconsultus fuit, tractari ordinarique, atque ita referri ad se præceperit, neque ullam constitutionem sanciverit sine xx. Jurisperitis, & doctissimis ac sapiëntissimis viris, & id quidem ita, ut iretur per sententias singulorum, ac scriberetur quid quisque dixisset, dato tamen spacio ad disquirendum cogitandumque, priusquã dicerent, ne non-meditati de rebus gravibus & ingentibus dicere cogerentur; si veró de re militari tractaret, milites veteres & senes ac bene meritos, & locorum ac bellorum & castrorum peritos, & literatos, & maximé eos, qui historias nossent, in consilium vocaverit, requirens quid in talibus casibus, quales in disceptatione versabantur, veteres Imperatores vel Romani, vel exterarum gentium fecissent; Item cum inter suos convivaretur, aut Ulpianum, aut alios doctos homines adhibuerit, ut haberet colloquia literata, quibus se recreari dixit & pasci: Ita noster inclytus heros de omnibus incidentibus negotiis in consilium adhibebat doctissimos quosque, cum iisque libenter conversabatur, & eorum colloquiis & sermone delectabatur, & si sacra vel Theologica negotia tractanda venirent, cum Theologis; si Juridica, cum Jurisconsultis; si historica, cum historicis; si politica, cum politicis; si œconomica, cum œconomis; denique militaria, cum militaribus, & earundem artium peritis primó tractabat & communicabat, & postea quod sibi optimum videbatur, ex illorum consiliis eligebat & concludebat; non aliter quám sicut etiam Carolum quintum ferunt in deliberationibus, Consiliariorum sententias audire solitum fuisse, sed illis præsentibus nihil conclusisse, sed suo judicio solúm postea, quid tandem facturus esset, constituisse.



Et quamvis tam rebus privatis quàm publicis semper occupabatur, tamen ut Julius Cæsar apud Lucanum gloriatur,

*Se media inter praelia semper*

*Stellarum cæliq; plagis superisq; vacare:*

Sic noster princeps in mediis turbis negotiorum, syderum doctrinam colebat, & revolutionum cœlestium leges ac periodos observabat. Nam ut Petrus Appianus refert, se in bello Germanico anno 46 Ingolstadio oppido Bavarie, ad Carolum v. in castra urbi tum vicina evocatum fuisse, ut in machina certis rotulis orbis circumducentibus, representante planetarum motus proprios, aspicienti certius & accuratius singula Cæsari monstraret: Ita noster Princeps similiter machinis mathematicis ut plurimum delectabatur, & mathematicum studiosos præ aliis amabat, & in suo conclavi, seu quocunque etiam peregrè abiret, semper globos cœlestes & terrestres, & alia instrumenta mathematica habebat, & secum circumferebat, ita ut nullo unquam ferè tempore cum ipso fuerim, quo non tractando & expediundo etiam varia & sæpè gravissima negotia, simul motus syderum contemplantem & considerantem deprehenderim. Sed potius me dies & tempus deficeret, quàm ipsius laudes κατ' ἀξίαν decantarem, quod neque, ut suprà quoque dixi, mihi jam propositum est, neque impeditus dolore & ingenii inopia facere possem. Idcirco de illis potius silere melius puto, quàm parùm dicere, cum aliò me properare jam tempus admoneat.

Cum igitur talem tantumque Principem amiserimus, cujus ad restituendam pacem & religionis emendationem, & quidem hoc ipso

*Tempore, quo toto sævit Mars impius orbe,*

& penè tota Germania civili bello ardet, autoritate, prudentia & animi magnitudine maximè opus erat: meritò illius mortem deflemus, lugemus & deploramus, non tantùm quòd Principem amiserimus, cujus consilio & autoritate publica mala sanari

nari potuissent, sed quod illo moriente, non domino, sed patre, & quidem alienissimo tempore, orbatum sumus.

Quia verò cum ante annum, vel circiter, optimus Princeps noster similiter graviter decumberet, & nulla spes vitæ reliqua appareret, ministro verbi ipsum consolanti & admonenti, ut omnem spem & fiduciam suam in DEUM vivum, & ipsius Filium JESUM CHRISTUM, unicum Redemptorem & Salvatorem nostrum, projiceret & collocaret, & ex eo postea querenti, num hoc faceret? an in CHRISTUM Filium Dei crederet? Stomachabundus non nihil tunc temporis responderit; in quem aliàs credere deberem? verum paulò ante agonem etiam has voces repetiverit: Sta, seu siste gradum, JESU CHRISTE; procul dubio hoc rogans & orans, ut sibi in hora mortis esse *missus*, assistere & astare vellet; nec non alia plura signa & indicia veræ constantisque pietatis erga Deum ediderit, imò se jamdudum ad mortem preparaverit, cum & ante semestre spacium anni, stannum ex nundinis Francofurtensibus afferri serio mandarit, ex quo sibi pheretrum conficeretur; non dubium est, quin cum ipso præclarè actum sit, qui calamitosam hanc vitam deposuerit, & quod jam sit in cætu eorum, de quibus Apocalypsis 14 dicitur: Beati mortui, qui in Domino moriuntur; Idcirco ei talem vitæ exitum potius gratulémur, in quo tam multa signa extant, ut immortalitatem adeptus, non amisisse vitam merito credi debeat, quam ut ob ejus mortem, sicuti quidem deceret, pullati, lacrymas & luctum sumamus, apio flosculisque sepulchrum ejus ornemus, lymphas aspergamus, odores adoleamus; quibus tamen officiis, si ab Ethnicis ea mutuaremur, nihil proficeremus.

Et cum filium magni ingenii Principem Landgravium MAURICIUM reliquerit; de illo nobis non solum optimam spem faciamus, verum potius certò promittamus, eum sicut paternorum bonorum & opum, ita etiam pietatis, & aliarum virtutum, heredem & successorem fore; præsertim cum & patrum habeat, Principem pium & prudentem, Dn. LUDOVICUM

Landgravium Hassiæ, Dominum nostrum clementissimum, qui quod ejus ætati adhuc forsan deest, suo consilio & prudentia supplere possit. Idcirco in hos illustrissimos Principes, & Landgravios Hassiæ, oculos conjicientes, eorum nos tutelæ & fidei cōmittamus, & tam privatam nostram, quàm etiā salutem publicam illis commendemus. Oro autē DEUM Opt. Max. toto pectore, ut novum imperium Landgravii MAURICII fortunet, quó ad divini sui nominis gloriam & propagationem cœlestis veritatis, deinde etiam in salutem & commodum, tam Hassiæ, quàm totius Reipublicæ Christianæ sedat & vergat, & his miseris & turbulentis temporibus, has regiones & totam Germaniam protegat, nec barbaricam vastitatem in ea fieri sinat, sed Ecclesias ipsum veré agnoscentes & invocantes, sicut & earum hospitia, & honestam disciplinam, & doctrinarum studia, nec non ab omnibus impendentibus periculis & malis nos clementer tueatur, custodiat & defendat. DIXI.

